

西陲總統事畧

卷三之四

西陲總統事畧目錄

卷三

南北兩路疆輿總叙

南北兩路山水總叙

南北兩路卡倫總叙

南北兩路軍台總目

西陲總統事畧卷三

宮保將軍松筠湘浦纂定 男熙慶亮績校字

原任山東知縣汪廷楷仰亭原輯

原任戶部郎中祁韻士鶴臯編纂

原任城守尉尉宗室賡寧安齋繪圖

前任吏部員外郎程振甲也園校刊

南北兩路疆輿總叙

今之新疆卽古西域出肅州嘉峪關而西過安西州至哈密爲新疆門戶天山橫矗其間南北兩路從此而分由哈密循天山之南迤邐西南行曰土魯番曰

喀喇沙爾曰庫車曰阿克蘇曰烏什曰葉爾羌曰和
闐曰英吉沙爾曰喀什噶爾是爲南路由哈密踰天
山之北迤邐由北而西曰巴里坤曰古城曰烏魯木
齊曰庫爾喀喇烏蘇曰塔爾巴哈台曰伊犁是爲北
路漢書西域傳所載南道北道皆在天山以南今之
所謂南路北路則合天山以北而中分之總屬於伊
犁新疆全境之地東界安西州東北界阿拉善及喀
爾喀蒙古北界科布多西北界哈薩克部西南界布
魯特及霍罕安集延等部南界西藏東南界青海蒙
古東西七千餘里南北三千餘里周圍二萬餘里就

其相距道里計之自伊犁惠遠城東北行一千五百餘里至塔爾巴哈台城又東北七百餘里與科布多
以額爾齊斯河爲界伊犁自北而西及塔爾巴哈台
東北一帶皆哈薩克游牧伊犁西南一帶邊外皆布
魯特游牧自伊犁惠遠城東行一千餘里至庫爾喀
喇烏蘇城又東經綏來昌吉二縣行八百餘里至烏
魯木齊城卽迪化州俗呼爲紅廟子者也自烏魯木
齊東南越博克達山通土魯番五百餘里自烏魯木
齊東行經阜康縣行四百餘里至古城又東經奇台
縣七百餘里至巴里坤城有鎮西府及宜禾縣在焉

南卽天山極高峻路經天山行三百餘里抵哈密城
此北路之疆域也自伊犁惠遠城南越穆蘇爾達巴
罕至阿克蘇一千餘里由阿克蘇西北二百餘里至
烏什由烏什而西經樹窩子草地行七百餘里直達
喀什噶爾城乃捷徑布魯特游牧於此凡伊犁西南
及阿克蘇烏什西北一帶皆布魯特游牧卽所謂東
布魯特是也自阿克蘇由南而西一千四百餘里至
葉爾羌城自葉爾羌西北五百九十餘里至喀什噶
爾城中自英吉沙爾城其巴達克山回部距英吉沙
爾西南烏魯克卡倫一千七百餘里喀什噶爾所屬

卡倫以外與布魯特游牧連界卽所謂西布魯特是也外通安集延及霍罕諸部落又自葉爾羌東南行七百餘里至和闐城迤南沙磧戈壁或雪嶠連岡路不復通自葉爾羌東南出庫庫雅爾卡倫經和闐西南行月餘可達西藏沿途山徑狹隘間多煙瘴路極難行詢之克什米爾及安集延喀齊商回言由西藏西北拉達克之地往復貿易有至葉爾羌者先年準噶爾台吉策妄阿喇布坦遣其將大策零敦多卜擾藏曾由此路云自阿克蘇東北行七百餘里至庫車城庫車西南一帶界阿克蘇和闐西北至伊犁一千

七百餘里庫車東南皆沮洳草澤人馬難行自庫車東北行九百餘里至喀喇沙爾城由城西北經著勒土斯河至納喇特達巴罕四百八十里接伊犁東南界喀喇沙爾東南一帶或沙磧戈壁或湖灘泥淖人馬難行自喀喇沙爾東北行九百餘里至土魯番東南經闢展回城約五百餘里至羅卜諾爾卽古蒲昌海也又東南多戈壁大山界連青海西北界連烏魯木齊自土魯番東北行一千二百餘里抵哈密城此南路之疆域也由哈密南至南湖二十里外俱戈壁北與巴里坤宜禾縣連界東至嘉峪關一千五百餘

里其嘉峪關外赤斤湖地方南行百餘里至庫克拖
羅垓卽青頭山路通青海凡關外赴藏熬茶之蒙古
人等經行此路焉

--	--	--	--	--	--	--	--	--	--	--

南北兩路山水總叙

新疆境內之山發脉於葱嶺自西而東天山最大卽漢書所謂祁連山山之陽爲土魯番哈密山之陰爲巴里坤然跨越數千里重巖疊嶂隨地異名最著者在北路若伊犁之額琳哈畢爾罕塔爾巴哈台之楚呼楚烏魯木齊之博克達在南路若喀什噶爾之玉斯圖阿爾圖什葉爾羌之密爾迪和闐之桑谷樹雅烏什之貢古魯克阿克蘇之穆蘇爾達巴罕喀喇沙爾之博爾圖達巴罕皆其分支盛夏積雪不消俗概以雪山呼之新疆諸水分流異趨南路之水皆東流

出自南北山中若喀什噶爾之烏蘭烏蘇葉爾羌之
玉河和闐之哈喇喀什玉隴喀什二河烏什之瑚什
奇阿克蘇之渾巴什庫車之渭干喀喇沙爾之開都
悉東滙於土魯番之羅卜淖爾凡南北山積雪融化
之水皆入之齋淪渟滹伏流地中卽古蒲昌海也北
路之水若伊犁諸河多西流塔爾巴哈台之額爾齊
斯諸河多東流烏魯木齊之瑪納斯諸河多北流或
歸入淖爾或流經葦湖或伏入沙磧以及雪融會合
之水甚多蓋嘗一一詳攷之 伊犁之山有格登山
在城西南一百餘里有額琳哈畢爾罕山在城東北

哈什河接連圍場山陰一帶約三百餘里有阿布喇勒山在城東二百餘里哈什河東一帶與烏魯木齊之博克達山一脉有阿勒坦額墨爾都圖山在城西北四百餘里有塔爾奇山在城東北一百餘里有崆郭羅鄂博在城東北五十餘里水則有伊犁河附近城南綿亘千餘里流入哈薩克游牧有哈什河在城東北二百餘里有崆吉斯河在城東七百餘里此二水即伊犁河有特克斯河源在城南隔山三百餘里東流而北北而西亦爲伊犁河上流有奎屯河有策集河有薩瑪爾河俱在城西北三百餘里有霍爾果斯河

在城西北二百餘里有察罕烏蘇山泉在城北二百餘里有阿里瑪圖河在城北二百餘里此外東北而南尚有烏哈爾里克有關里沁有濟爾哈朗有博羅布爾噶蘇有察布察爾各河汲水灌溉廣利屯因有賽里木淖爾在城東北隔山二百餘里係察哈爾游牧西南一帶又有特穆爾里克有格根有哈爾奇喇有察林諸水皆資游牧凡境內之水皆朝宗於伊犁河惟賽里木淖爾不與焉西南四百餘里鄂爾果珠勒及哈爾奇喇等卡倫以外行百餘里有善塔斯大嶺山中多產野葱疑漢書所謂葱嶺者此其支脉自

善塔斯西行三百餘里至特穆爾圖淖爾其水周廣數百里西北南三面皆山山麓皆布魯特游牧沿岸湖沙土人以之熬鐵特穆爾者譯言鐵也圖者有也淖爾者海子也言此水產鐵故名並產大魚由淖爾南岸越巴爾渾大山渡塔爾垓河溯流向東南越大山可達回疆烏什此水西流歸納林河入安集延由淖爾南岸至塔爾垓河共行三百餘里西南過察奇爾圖大山經穆蘇爾達巴罕西麓由此而西仍經布魯特游牧又行五百餘里至鐵里治克山嶺下二十餘里西而轉南由南而東共行四百餘里至喀什噶

爾矣穆蘇爾達巴罕者冰山也在伊犁南界自伊犁西南行一千五百餘里始至山趾云 塔爾巴哈台之山則有塔爾巴哈台又名楚呼楚在城北一百餘里有巴克圖山在城西七十餘里有珠爾呼珠山在城東北二百餘里有霍博克薩里山在城東二百餘里有達爾達木圖山在城東南五百餘里有巴爾魯克山在城南二百餘里有格德蘇山在城西南五百餘里有綽諾庫圖勒山在格德蘇山迤東水則有額彌勒河城南綿亘三百餘里有固爾圖河在城東南二百餘里有額爾齊斯河在城東北七百餘里與科